

文苑英華卷第五百十六

判十四

祭祀一

祭天地嶽瀆十九道

祭天判一道

祭地判一道



祭星判一道

祭后土判一道

祭社判一道

祭不<sup>社</sup>奏商均判二道

祭五嶽判四道

祭四鎮判二道

祭天判

立冬日南郊祀昊天上帝所司不歌由唐長奪其俸祿訴云有其義而忘其辭

對

立冬而郊先王之大禮備物以祭國家之舊章祝史正詞  
孚聖德於上帝牲牲肥腍降景福於明神機象既陳匏竹  
攸設所司蒞職寧闕禮經三獻或陳且不乖於祭法九成  
既奏何必在於由庚苟辭亡而樂在一作在  
遽茲奪俸無乃非辜彼有辭焉捨之可也

祭地判

有司以陰祀用駢牲廷尉議罪云牧人不供

對

陳儻言

君上事地典禮孔明臣下奉天祀物斯辦以駢牲類圓德  
以黜牲奠方祗必齋躬以裸將咸先甲以從事今乃居陰  
位施陽禮紊百代之則循循一時之宜豈惟不嚴於神唯乃

有醜於國且祭以崇德禮以昭辰敬况在唐堯之朝守禮樂  
之秋而享祀顛若牲牲昧如回可捨其不供之辭責其尸  
位之罪

祭星判

甲祭司人沃盥執燭而獻人數未便陳玉徹奠監祀糾其  
失儀甲訴云來歲美惡豈玉能知

對

利用祭祀肅敬鬼神不憊乎物實受其祉甲欲司人事著  
宗伯當執燭以獻數亦敷玉而備儀何肆無稽之言用虧  
有恒之典雖雅有洞酌以清潔為貴而傳稱瓘案在祈禱  
則施福善苟違珪璧之所傷無幾薦誠或應黎元之所獲

則多既靡終於舊章奚將表於明德神則不享吾何以觀  
糾夫失儀信為得實罪自揆也刑其捨諸

同前

劉廷實

祭神如在肅事以敬求之髣髴望及諸幽待以精誠同來  
當日甲司小職謬乎大義盥而從事情初寓於夙興燭以  
終歌理乃失於明發獻牲雖奠禮玉未陳苟蘋藻之可嘉  
將珪璧而何用雖氣均通正自調風雨之期若歲備祈禳  
將從雲漢之祀入刑自通於抵玉論罰不假於鈎金

同前

程廷玉

惟天生人罔不克乂所以陳玉帛奉粢盛啓墊而郊方祈  
歲德既盥沃以告虔爰執燭而抵事簫韶始奏謂丹鳳之

來儀莫獻垂方寔鸚鵡之是問禮虧陳玉祭則徹懸雖以  
歲美為辭其如失禮貽譴在祀之禮誰其捨諸

同前

張默之

祭祀之儀精誠為大陳列之品持玉攸先苟違禮經神將  
焉饗故博碩肥腍無禮不足為豐潢汗行潦有禮不嫌於  
薄雖既灌之後吾不欲觀而陳玉之前故為徹奠有年雖  
不由玉無禮誰愛其羊覽甲訴之詞覺其小失詳監祀所  
糾頗為合宜

同前

孫文臣

天垂衆象地列百神四時祀之廢一不可所以爰命於甲  
有事司人如在表至誠之懷惟馨祈莫大之福遂能就盥

除穢用燭明儀既俎豆而式陳冀珪璧而必薦諸具已備  
惟玉未陳謂監祀而罔知何糾事而斯當詞雖不已其難  
捨諸

祭后上判

仲冬有祀於后土靈鼓不以節法司按罪訴云金燭之過

對

鼓以格神金能制樂各率爾職斯謂守官國家展禮汾陽  
和穀惟上享祀不忒威儀孔昭薦鼎已覆於黃雲配俎必  
資於清奏神人式序金石克諧坎其以都進不失旌樂之  
時義其大矣哉相彼鼓人佑我祭典理宜徹茲六變以出  
地祗何得舛此八音坐罹天討曲誠有誤問迴顧於周瑜

聲無可聽關

疑

稱羨於吳札法司按罪其如有詞請議

燭之刑捨此援摶之失

祭祀判

宋元君叩鄆生鼻血祭祀人告妖

對

李廷暉

樽俎牲牢歲時享獻祭神如在明德惟馨感以此誠膺茲  
介福先王令典列代通規且有生最靈惟人爲貴怨嗟尚  
傷於和氣淫酷豈叶於明神今扣鄆生之血以充勾龍之  
祠且送終尚不致殉祭社焉可用人往諫前非恤事不遠  
原情擬罪在法難容告以爲妖或亦未可求言其雪湏寘  
于刑

同前

范仲邕

滅蔡用隱無宇興言伐莒獻俘周公不享馬先猶不用馬  
人社寧容祭人惟彼宋君志多剛狠惡有大而必陷善無  
細而必遺遂取鄆生以血祭社愚管窺此其傷實多或人  
所告深符至道殺人者死傷人者刑先達所制後進攸則  
一作宜投正法庶革來祀

同前

王元貞

諸侯力爭乃立冢土動衆興事受服攸行同盟之君先尊  
霸主附庸之國亦屬大邦用鄆子於次睢皆喚宋主將蹶  
由而釁鼓不利楚家此乃魯史明文殷鑒不遠靜思今者  
元君鄆子生事有符於曩辰何不仁於太甚生鼻取血誰  
其忍之畜不將人獨將何若眷言其事實類傷殘告以為  
妖仍將未得况明君有道弓矢載橐坐九重而納隍恐萬  
姓之失所有此殘酷其如律何

祭社不奏商均判

太社奏樂不奏商均有司將為失禮

對

李昂

聖有謨訓明徵定保於昭大社德洽生人雖烈山已還勾  
龍作配而享祀不忒國容孔彰鎗鎗雲門宛是天樂備物  
致用覺明鳳之不飛感靈動幽一作識潛魚之入聽是知  
樂之至也乾坤由是混和祭必肅然神祇所以丕祐國家  
九變具設六府孔脩噐陶匏而不奢聲鏗鏘以合雅澗酌

明信神其享諸非楚使之誇秦異曹翹之諫魯列聖敷典則有其儀商均不奏豈爲失禮

同前

暢諸

五土爲社二時宗祀諒殷薦而無差將報功而有序在國  
彝典主司常儀方今百工惟時六樂非濫故當明祀之禮  
從防暗室之欺宮懸備庭克奏降神之變豐幣在席以表  
至誠之款必仍舊貫當憑故實豈吹竽而混音何握蘭而  
妄舉內省不疚其詞未孚謬指商均之曲頗動周卽之顧  
祭五嶽判

所司有事恒山用沈辜御史糾失禮不伏

對

張秀明

天子遍祭無文咸秩牲幣之禮則有司存惟彼恒山是稱  
北嶽洩雲雨以潤物森草木而藏景有靈則祀故能視彼  
三公執文而行何其誣我五禮御史以寶符作氣雖久歇  
於無恤沈辜受欺魯不若於林放按以失禮竊謂其宜誠  
合沒齒無怨豈爲噬臍遇毒所司不伏雖聞飾非敢陳愚  
見以罰白金

同前

張楚

恒山臨代惟嶽降神趙主藏其寶符武侯啗以兵勢是稱  
靈鎮且具在祀典眷此宗伯用祭初寒黍稷惟馨德之是賴  
牲牢不謹職爾之由苟失沉埋之規何班咸秩之禮匪黷  
而慢宜其不歆自尊致尤將欲誰咎請從直指之按以塞

曠官之責

同前

張韓卿

星開并汾嶽鎮恒山聚氣成德蘊靈藏寶吐納煙雲之秀  
密邇胡狄之鄉國之大儀實在明祀所司有事期用無失  
絜牲幣而茂典舉析懸而諱名茲秩秩而備章佇穰穰而  
助福山既若是川亦有之抑此沈辜之迹寔鍾習均之祭  
爰考樂歌與流峙而無別及徵禮號乃科日之斯殊豈得  
視諸侯之秩薦三公之用苟則有紊孰云不知御史學優  
竹帛榮高衣綉既觀祠祀之差遂推一作簡墨之糾諒為  
昭範斯得罪人

同前

員押

能興雲雨山川有成秩之文以懸日月祭祀為不刊之典  
必考前志是謂禮經或忘甲令寧因官守惟彼恒山鎮茲  
魏國有虞巡符玉瑞班乎冀州無恤登臨寶符并於代郡  
干天之極括地之維先王是崇上公攸視四時有禮珪璧  
或聞其瘞埋百代常行牲牢不忘於剗割所司有事故實  
無稽沈既殊乎大川辜亦非乎小祀山川一作泉反覆禮物  
徒施職業廢隳刑章安捨惠文直指始跡事而平彈尸祝  
無能遽繁詞而直對不有不蔽何徵曠官

祭四鎮判

祭醫巫一作無問非是五郊迎氣日復無祀官法司科營州  
刺史罪不伏

對

閻抱庶

凡諸嶽瀆年則一祭祭當何日五郊迎氣之辰祀用何官  
千里宣風之職只如無閭峻嶠作鎮邊方營州刺史頃崇  
望秩自合顛若觀盥率由舊章豈容祀匪其時身不預祭  
自貽厥咎何追其德行睽奠祭之規坐招法司之議準法  
科附仍下營州

同前

惟彼營州寔建司牧旣班禮樂復典山川尊夏后之前謨  
佐皇朝而作乂且醫閭作鎮祀典攸該或每歲以薦誠或  
隨時而致享克敷顛若或備牲牲國之大儀允有常憲春  
言州將奚紊舊音平涓吉日而非時捨祀官而莫預自臨分  
戚其可捨諸如也非因大祭苟爲小祀去黍稷之非縻存  
乎明德採蘋蘩而式薦將以昭儉未爽正途難貽濫罰片  
言將折兩聽猶疑期於無刑請重推鞠

八月二十八日檢正七十五字

文苑英華卷第五百十六



文苑英華卷第五百十七

判十五

祭祀二

祭山川百神門六道

不供祭用判三道

祭七祀判一道

百神判一道

鬻辜祭不供物判一道

祭宗廟門十一道

鬯酒不供判五道

太廟登歌判一道

造禰判一道

薦新判一道

犧牲判一道

祀王判一道

掃道判一道

祭山川百神

不供祭用判

景奉使沉埋虞人不供其用

對

張利貞

國之大事必存乎祀禮有五經莫重乎祭故肅事享薦雖  
不祈求而歆馨碩德是資昭報主上纂堯丕緒欽虞大孝  
是卑宮室固非為已用崇享祭其以佑人故臨遣制使聿  
脩祀典飭躬戒告展事采錯司馬相如封禪書作展采錯事捧玉一作幣  
潔牲盛儀宿設嘉樂具舉川先河後得沉浮之儀因方  
即陰合瘞埋之禮比時具物責成存乎有司虛中慮事先  
令期於使者彼何為爾而敢闕供夫惟虞人不應無訴

同前

李宙

厚德載物山澤通氣珍恠期齋虞衡是職無幽不通在山  
川而有事至誠則感故鬼神以是依惟景肅將天威祗若  
事典式崇望祀之禮用展沉埋之義而虞人不虔祭物有  
闕各守爾典奚曠於庶官莫恭其職自貽於伊咎請舉虞  
人之罪歸於士師之辟

同前

李寧

社稷五祀山川百靈有國有家是尊是奉徧群神而致享  
環一作理四時而不忒爰以使臣巡行郡縣職茲望秩之事  
崇是沉埋之禮或陳典法無替虔恭况徼福假靈沉璧埋  
幣罔不祗肅通乎至誠蘋藻方薦粢食不鑿神疑作禮官傳  
士分典斯務庖人尸祝各守是司事或有違罪將何追且

我愛其禮一有而爾二字闕供由是一作其寘罰神歆其潔克誠呵何  
以享斯眷彼虞人掌茲山澤不守其祀自貽厥憊宜寘平  
刑以懲不恪

祭七祀判

甲為鹽人緣祀中雷供祭或告慢神訴云於事無失

對

邵瓊之

國禮在祀先王志其嚴絜神歆惟德之靈聖金期於肅恭苟有  
孚於蘋藻固非馨於黍稷鹽人職列周官事供王祭因潤  
下之成用備奉上之班司屬夏禴爰臚群祀咸秩孚薦饗  
於中雷式虔誠於內饗五材之味或爽七祭之容遂闕然  
時有異同事有隨變至信為用且一作應明心饗雖不虧誠

何傷介福既異不供之罰難科作答之刑若

百神判

將事百神差日有司不舉

對

講信脩睦禮行於時人和年豐神降以吉屬歲陰云暮田  
峻至喜農事不作役軍告休於是乎具器孚薦陳粢戒掌  
答成功於衆神設禋祀於大蜡雖既滌既灌不騫不忒日  
遠精擇神將苟歆吁嗟是司不謹有職昔仲尼觀魯助祭  
興於喟然今太卜差時饋神失於顛若祝史陳信其多媿  
詞司存不舉坐寘恒罰

醴辜祭不供物判

以醴辜祭百物不供

對

馬挺

水旱雩禱山川沉埋畢為兩師斗亦司命順四時之序祈  
萬姓之福醴辜充祀於百物望秩備禮於四方事或闕供  
罪亦斯得無止風之磔狗同告朔之餼羊卜而罷郊以著  
春秋之失祭而廢禮宜投司寇之刑

祭宗廟

掃道犧  
牲附

鬯酒不供判

太常申博士請鬯酒光祿以久無匠人且金草不知所  
出不造祠部亦以為禮有沿廢不允所請寺執見著唐禮  
豈得不行祠部云籍田準令兼給廩犧籍田今或不供犧

亦廢用酒無鬯於事何闕寺猶固執

對

趙岳

雍穆清廟苾芬孝祀為酒為醴以蒸以嘗執鬯玉之黃流  
香鬱金之美草觀灌顛若居歆孔明鬱人是供鬯人聯事  
司樽爨之築鬯右爨字周禮  
肆師及果鬯贊宗伯之裸將自周道崩離  
禮籍咸滅漢儀草創祀典多湮有徐生之為容非如叔氏  
雖匡衡之復古未及周監其後浸微不資沿革奉常執典  
同削氏之鏗鏘光祿蒞祠無大酋之湛饁莫行其義徒紀  
斯文皇聖時乘官人則惠禮司皆好古之英美博士有表微  
之職將盡善而論德同大道之中行豈可以沿廢為言積  
習而惑未辨方志不監匠人何荆州之苞茅獨供王祭有

盧家之蘭草不入國香惟昔肆師位同祠部無爲大祭之  
佐不若吾子之言又以籍田明乎甲令去禮經之逾遠類  
俗吏之所爲且甸師之給神倉案案以供鬼享號文諫千  
畝之籍崔寔刺數畝之耕亦曰文存不當禮廢使唐禮不  
備於周禮比犧牲苟供於廩犧旣慢乎粢盛仍拒我鬱鬯  
宜投棘署俾解星郎

同前

楊浚 總目作湯俊

祀事孔明必先於酒醴神其戾止亦在於馨香所以實彼  
樽彝達其牆屋太常恪勤乃職無忝司存光祿簡慢是彰  
自貽伊戚且酒人之職素著於周官酌飲之儀頗聞於班  
史後因夏禮斯損益之可知漢立秦詞祠固典章而無墜本

經不失前法宜遵何廢禮而速尤欲墮官而招譴苞茅不  
入尚責於齊侯鬱鬯廢供且虧於唐禮旣不知於金草期  
疑作自掛於王條詞部所云奚其不當徒稱沿廢罕顧禮  
經且千畝陳儀牲牢致用而三清泛薦犧象焉施仙臺所  
論愚管非測禮虧顛若刑其捨諸

同前

斐幼卿

郊禘有常春秋匪懈人神足以叶祕禮物於焉致和薦黍  
惟馨微茅有典爲酒爲醴將見供於鬯人或廢或存且生  
文於甲令至如氣交殷臭法變周因始有襲於焚蕭竟將  
申於酌鬱灌以香草陳於卣罇備一獻之登歌知百神之  
受職固當所習寧越禮經况乎祀典有崇太常攸掌制經

且陳斯品著令元劑此條光祿不供自覺罇之罄矣籍田  
為喻誰云井有人焉舊章無替於執文王典豈新於改作  
三覆華省徒且慙於有司拜覽太常實未乖於彛典

同前

權寅獻

五帝殊功不相襲樂三王異俗豈同常禮是以因事立制  
則制施而下從量時署官乃官脩而人理苟有其闕誰執  
其憊且祭天饗神太常攸主鬱大酒正光祿是司率彼舊  
章博士諸供而有裕顧瞻新職匠人久廢而何憑夫以誠  
敬無文精靈不測若昭之以明德聽之以和聲則澗谿沼  
沚之毛可羞宗廟潢汙行濟之水堪薦鬼神且虧季蘭之  
誠何必鬱金之草况國家光膺駿命克享天心合昭穆以  
繫精下神祇而誠感酌至玄之酒七廟孔脩奏無聲之樂  
六宗攸序所以鬱鬯之禮見遺而不行金草之司有文而  
且闕省司含香推妙起草稱工酌一人之心是言沿廢引  
三推之令遽比兼供籍田既不供犧牲造酒何煩供鬱鬯  
禮雖見著令式空存請從祠部之言無聽太常之執

同前

國家大禮畢具無文咸秩聲名赫乎上古享獻周於百神  
每窮谿澗之毛誰爽案盛之備太常宗廟攸奉禘祫爰司  
張君理窟之才王肅儒崇之望請供鬯酒擬實尚罇允得  
事宜雅符恒典光祿以無匠不造又用靡草為辭有司以  
沿革不同兼引籍田特比犧牲不廢愛禮斯深鬱鬯莫供

司存何劣且鬯人之職須預其材疑釀金草之芳酌充蔓  
茅之既灌何得不供所務輒替彝章光祿拒之於前祠部  
送之於後事均齊楚得失疑而兩兼理同臧穀亡羊而一  
揆况國禮明著安可闕如咸請推窮方結刑憲

太廟登歌判

冬享太廟登歌擊拊大管不作法司科管者詞云鼓轉不  
奏有所由

對

邊承斐一作裴斐

蒸嘗有儀霜露是感必先金石之序以降神祇之福故潔  
粢豐盛年和登也博碩肥膄人力存焉使三獻克終九成  
斯辨堂上堂下咨樂正而為節載拊載擊播頌聲而有倫

大管或虧小轉

一作鼓避諱

攸闕既齊楚以引過奚韶讓以金

雅宜寘法司以應伏念

造禩判

景以飴鹽造禩或責以若鹽若有關

對

田儀暄

虔稽祀典類造之禮攸陳緬睎齊筵俎奠之儀當潔景麗  
名宗伯展事鹽人白黑孔脩錯形飴而在列玄纁判一作則  
備考醑苦而斯乖雖德之惟馨亦或罔吐而物有奠具謂  
何獲釐大事闕供小懲非道

薦新判

春日薦新乙不送鹽

對

蒼龍正宿朱鳥方春山梅早花沼萍新葉嘗新傳於楚俗  
先薦表於周年採蘋奠誠式遵於南澗進櫻追遠首在於  
西京至若類獸之鹽唯調和於醢醢闐陽之薦恐有隔於  
蒸嘗請準恒科以懲其慢

掃道判

甲主郊道當泥掃及道甲脩故而除無所改易所由科之  
不伏

對

經途九軌列以城國通莊四會達彼川梁廣直如弦有文  
侯之擁篲脩乎若砥見伯也之執爨非摠蒺藜將樹桃李  
無使障塞用絕艱虞歲祀不除時響不理甲掌惟郊道侯  
承司祭喪者輟哭田燭是為百神以宗方陳明水之薦三  
條是務式崇新土之宜類築傳巖固將遵於大制殊開京  
兆亦何更於前名苟難榛蕪足歆蘋藻誠為獻力匪曰犯  
刑且汜掃理在恭嚴反道義非變易何必改作方設興功  
修故而除足奉虔誠之節棄核而按未通按獄之明

祀玉判

對

甲掌六器不依方色所由加罪訴稱玉人闕供

顧健

國有五禮甲主六器或欽若天地或虔奉廟桃將以降神  
祗辨方色則必臨之以莊敬守之以豐潔使舊章攸叙靡



物不精甲豢曰司存宜其祗肅徒尸此職曾不是省六宗  
有祀已墜虞章三禮何知載憊周典所由加罪亦謂金銘  
一作金名罪勿言文過飾非方推玉人有闕若懲求有志一作至  
自可預論既臨時有乖欲何逃責闕供之罪定罪非遙未  
知祠祀所須爲復陳設所祀待知本坐庶論如律

犧牲判

太常申稱充人養供大祀犧牲不如法致瘦損

對

精靈不測有上下之神祗敬誠無文有春秋之禴祀若昭  
之以明德聽之以和聲則澗谿沼沚之毛可一條於宗廟  
蘋繁蘊藻之菜可一薦於鬼神若無肅敬之心而有滛昏  
之祀則卜郊非祀國史由其致譏齋戒不嚴天皇於是流  
譴充人早霑明化豢曰司存職三犧之純養供六牲之蕃  
物固調其黍芻之食繫其文綉之衣豈容不整羽毛曾無  
博碩致令瘦損須寘科條

同日又校改正六十四字

文苑英華卷第五百十七

文苑英華卷第五百十八

判十六

祭祀三

封君諸侯大夫門下九道

封君祭判三道

諸侯祭判一道

大夫祭判一道

三命判四道

家廟失祭判一道

牢祭有違判五道

封君祭判

乙祖是始封君祭以不毛所司將為失禮不伏

對

周之翰

封植之規盛自三代享祭之設編諸五禮故存欲其貴梁  
竦發勞人之言沒憂其祀若傲興餒而之歎乙祖幸攀日

月視列山川堂構不貽於謀孫廟食遂虧於厥祖乃云可  
薦孰致其嚴洪業不享其牲牲明懷誰歆其黍稷所司重  
從周之訓糾以常刑愚者昧及魯之言尚多紛訟彼不愛  
禮奚能捨諸湏寘恒辜雅符通議

同前

武同德

禮經三百列爵五等食菜地以居榮封茅土以建號代不  
絕祀人其捨諸乙以孫謀瞻言祖德精意以享展如在之  
儀利用建侯思乃一作不復之始詢諸家祭酌彼周官薦羞  
之容無聞於肥腓不毛之事有異於粢盛且物貴緣情猶  
言禮不下庶而乙非妄作何妨儉而合禮既能師古奚事  
驚愚所司告言頗為漏畧大易自宜室訟春秋寧代有詞

同前

張鼎

百王率由禮建方社六服咸若寄切維城列玉璫以推尊  
錫圭田以表德綬分四色爵配五等開國稱孤彼既光於  
祖業列筵設奠此何昧於家聲言念庖牲空慙掩豆雖展  
敬於如在果見啗於不毛葬以太夫禮既隔於問子爵為  
侯氏祭豈及於謀孫親牽之用頗垂受脰之名應缺自湏  
聞義能徙何不以欲從人

諸侯祭判

私廟三室將置新主家老毀擔主人訟之所由以非禮免  
之

對

閻伯與

毀廟遷主告終稱嗣父昭子穆將順從時之典易檐改塗  
恐墜思先之威儀雖仍舊禮則謀新初致孝以觀德終因  
心而崇敬歲聿云暮祭則有倫守宗裕之威儀率由殷奠  
考新宮之成式虔奉外除所謂斯人未明古道訟彼家老  
自貽不臧

大夫祭判

有五品祭寢不祭廟饌用索牛御史刻於寢則以陋於饌  
則以泰訴云禮令無違

對

常無欲

禮有九命聞之典秩爵性五品存乎令制以祿饗親追崇  
事敬之道以賢致位周旋名器之間從事於斯無宜失墜  
執禮以動何所遲迴然則吾從大夫之后祭中寢而非葵  
奉守先王之典用太牢而為過今則無廟予欲何之索而  
致牲古亦詳矣憲臣按法操持一作柄特深訴者執詞情理  
可據

同前

劉昇同

國政通班書崇明祀朝則齒爵載分於羔鴈祭必毛牲取  
類於豺獾惟彼五品薦于四時籩豆聿脩履濡霜而或惕  
寢門是祭因掃地而致誠克恭行蒞之酌或備菜蘋之奠  
雖夫子立言且云寧儉而聖人行禮必貴從宜恭已習常  
情稱偪下因心達孝事則由衷屬避馬申威出漢臺而有  
問索牛是効撫周禮而猶疑饌取於豐祭從於薄過如不

及吾恐失之必存著甲之令一作命請恕先庚之罰

同前

斐士淹

命分九等以庸制爵禮有五經莫重於祭先王所以致理孝子為能饗親乃如之人茲率厥典敬無忘於如在道有孚於不黷黍稷惟馨籩豆有楚哀樂相半必覩儼然之容軒裳已登非復傷哉之歎且禮或豐殺法從沿革無廟於寢在今令而則然求牲而饌徵古訓而奚失嗟夫御史所劾恐傷曾孫是宜

同前

張鼎

廟者曰貌死者曰歸神人異業敬則如在牲牲必備祭而勿黷秩有五品榮加三命誠乃錫類孝能尊先春露既濡增怵惕之感秋霜已降發悽慘之心雖欲饗親孰為知禮祭於寢也自合判羊祀諸廟焉方聞用犢庖丁展事雖則無全鄒人將入如何不問令無立廟理歸於寢祭設庶人之位薦以大夫之牲索而用之非其古也蘋繁可重豈煩介葛之犧黍稷非馨寧展蒸嘗之禮精意以饗神其吐諸禮雖徵於曲臺罪自招於石室欲加之罪其無辭乎

同前

張鼎

人生最靈魂變為物儀陳祭禮祀分物類品第有差等威是列秩率朱綬雖登命於大夫廟闕冊撫未為能於孝子祭寢非約用牛是泰儉以備下已聞晏子之節禮而僭上更知管仲之罪蘭臺咳履雖陳膳栢署彈適竟持霜古訓

是則今令未裁且祭寢廟既有秋而分求牛索牛豈無故而殺効而是誠誠室惕而有孚訴者非辜終履校而無咎

三命判

乙仕登三命舉以特牲祀以少牢人告其僭加於舉禮也

對

柳芳

孝自天經禮為人紀事有動於神理迹無昧於生成乙則大夫位登右職庶極四時之享以符三命之貴飲食讌樂特牲備舉珪璧嚴奠少牢是加用誠信以敷心資豐潔而致薦是實一作實其訓何糾其違徵之於前固不可罰

同前

顏貞卿

脩食以樂執恭展禮以辨等威以明貴賤乙以筮仕策名

清朝從大夫之後既登三命循先人之祭有事十倫已而鏗鏘具舉和平不爽苾芬承祀胡考之寧舉特且叶於禮經加牢未虧於祀典人告其僭罔知攸伏一作徒從

同前

盧先之

易陳殷薦書列禋宗於昭考祀作樂崇德况春冰風泮河濱有額祭之魚秋葉霜凋山林有豸祭之獸微物尚爾一作

其生靈一作爾靈伊何且國有十倫仕登三命尊卑式序威儀

孔昭車服以庸祀享寧僭矧惟舉禮無乃用心凡舉特牲者克從其祀少牢者實符于班失或歸於訟人禮不黷於君子為之過矣其在茲乎

同前

馬撓

聖人成能設位待仕君子脩業考行入官等威有倫名器  
不假一作乙爵登寵命位列周行舉善膳有存乎禮物敬享  
無虧於豐殺既感霜露不忘豺獮是以用禴於焉展牲信  
以大夫之禮能行孝子之志緣祀而加誠不違於舊典或  
入妄告固未適於時宜雖二簋之可享豈少牢之為僭此  
其禮歟固無尤矣一作焉

家廟失祭判

為大夫家廟初成將享之夕牲死人告其違禮甲稱本牲

對

宗廟為先是營宮室犧賦為次則備牲牲甲運偶光華一作  
先羽成儀飾必復其始遂見稱家利涉大川爰假有廟一

昭一穆佇列蒸嘗經之營之旋終黜聖詳夫豐禮崇彼禘  
儀方有聞於容聲何不務於豐潔且始養為蓄畜卜日曰牲  
未就質明之期忽斃致齋之夕萬化先往寧俟剗剗三廟  
便陳實忘嚴敬用過乎儉誠不在斯事神則難深宜捨此  
祭器不鬻明君子之雖貧牲斃則埋乃先王之制禮靡尋  
典訓苟務所懷縱匪若教之憂終近晏嬰之隘祭則受福  
義必闕如刑以正邪孽何可適以本牲而文過豈精意而  
為心實昧惟馨宜懲彼黷

牢祭有違判一作少牢祭判

孟王具少年祭仲已遽執畢入贊者告已有違已云以備  
失也得禮之中何乃妄告俱詣博士定博士曰禮和為貴

豈在爭乎科贊者不伏

對

張大吉

惇宗將禮以祗祀事命滌宿宮存乎饗獻執觚奉爵理必  
祖於敬恭籍茅設洗事無忘於豐潔惟王榮班命數羔鴈  
同行擇日筮尸將行懿祀克牲視物且祭為先列羞鼎於  
門枋升俎載於階序巾盥在手餽核旅陳配平仲豚肩之  
陋思由也尸堂之禮仲已恪恭所職持畢而來仰觀好雨  
之星欲理如湯之鼎此乃思無出位舉不失宜贊者有言  
事同差舛博士科罰理宜當深故椒舉規過須有媿於國  
僑張湯用法將無慙於虞六詔請從寬典無寘急刑

同前

張綬總目作緩環

我將我享維羊維牛籩豆牲牢非無升降大夫命士亦有  
等威經禮孔明宗祀無替末言特牲之饋寔曰宗人之職  
筮尸筮日以崇賓主之儀東序東房克明兄弟之位况舉  
鼎告備雖符將禮執畢先入未或僣儀既南面以當階又  
尊主而備失其動也中伊糾胡為適明贊者無稽更彰博  
士同惡周旋既無失墜小言則亦何傷造次曾靡僣違知  
和豈能為貴惜其禮物博士不利於操刀正以刑書科者  
乃得其資斧既厚誣於君子亦淺之為丈夫將子甘心無  
或騰口

同前

劉系

祭者曰薦申其至誠鬼之言歸于以明德欲祠祖禰一作欲祀



祖補必擇牲牲苟爾儀之不脩則其咎而焉往孟王三命是服匪儼既無忝於孝孫將有事於皇帝宿尸致祝初設位於廟中執豆陳籩終展禮於堂上相彼祀事居然可觀饁以少牢俾申於孝享用其柔日願接於神明周旋自適於等威終始不忘於齋敬執筆而入信鄰人之知禮卒事無規奚贊者之妄告徒質疑於博士合書罪於斯人

同前

李子珣

祭惟備物往籍攸先禮以貴和前賢所重苟初事之不曠在疾徐之可容相彼孟王將有事於牲具瞻言仲已乃無何而畢入誠則恭不失備遽而中規俎豆之事載陳金石之音卒奏夫惟贊者忝預於斯研以日偕行還宜共濟安得縱茲大惑發彼小瑕殊成子之不恭禍徵受脤異陳佗之如忘豐起臨盟以懈怠之見規則聞前史因備失而歸罪且未合宜事貴無違禮崇得中請從博士之議庶叶隨時之理眷言贊者可無詞乎

同前

張子琳

祭禮崇孝事祀孔

一作克

明既前期筮賓亦將獻諏日於是

闕廟門以禮所敬在供列有司而行事不舉違犯孟王義

重五經職惟三命有豐卷之位不請因以用特牲

此句明疑

周公之典據少牢而乃給然尸祝甚儼雷

通作壘

洗具陳剛

鬣柔毛則云肥腩簋簋普淖所謂馨香宰人銜命以抽肩

見儀禮注肩鉞也

仲已遽資於執畢又以舉肉在禮寔曰無違贊

者則那每事奚其不問患既自掇爭乃增羞博士勿謂於  
貴和贊者終宜於伏罪

校正五十八字

八月二十九日

文苑英華卷第五百十八

文苑英華卷第五百十九

判十七

祭祀四

雜祭祀門二十八道

祭闕頒誥判七道

大夫菜地祭判二道

庶子牲祭失禮判一道

士祭判一道

足大牢祭判一道

士不合設壇判一道

用牲于門判一道

歸胙判一道

祭器判一道

祭器奢僭判一道

祭闕頒誥判

所可有禮事不頒誥所由斷徒訴不伏

對

斐子建

禮典之制期諸豐潔裸鬯將行無宜秕稗是以有司卜日而頒教所由先庚而讀法故能籩豆有楚殷薦聿脩皇祖降歆萬壽攸酢孝孫有慶百錄是荷若後時而不陳則臨事而或闕偶俱懼謗須一辨明彼以不戒視成居然有罰此以未承憲令無狀可明俱曰官臣當須慎守既一作貽伊怒尚曰奚爲

同前

常建

祀禮孔殷以供百姓禮容不肅奚疑作崇三獻興言國典厥在司存頒之猶恐不供不頒將何集事俾左社右廟奚捧幣薦牲方澤圓丘曷焚柴埋玉欲加之罪安得有詞必也禮或重輕法存降殺將定所刑之典須明所祭之神

以後徒宜其後命

同前

祖詠

祀事孔明展誠告備崇享獻之道則歌舞其牲嘉滌濯之容則詔相其禮取則不遠聞斯行諸政貴有恒人用不撓雖小祭大祭課乃義疑而職人克人曷不頒布况卸疑作罰麗事職汝之由天子有司是堪自頒龜玉毀楨曷所逃刑

同前

薛彥國

國有祀典以和神人思不出位是主蠲潔苟越率履不承權輿難乎守官直以窒暢所司實掌其祭或承之羞備物不頒於職人戒嚴有乖於先甲遂使奉牲之告不及於肆

師降神之典無聞於六變闕而為罪宜灼薰心過而必聞  
自貽噬臍詳諸秋典俾罰鬼薪

同前

郭庭誨

於糾禮官無辱祀典欽若天地肅恭神人如何有司失其  
頒誥將季氏之暗失由也之質明致使禋燎不供難為象  
祭燿火無設便乖漢典宗伯或差於三望太常乍闕於六  
宗職此之由而襲其守而天秩有禮罔不克集寘以徒坐  
復何疑焉

同前

梁乘

受福之祭固存乎肅恭出令以言實在乎頒告緊有司之  
不腆乃事神而未達不能先備禮物預頒祀典存彼舊章  
介茲景福雖自瀟納約所貴齋心倘入廟未知將何措手  
若也禮則斯缺人心匪虔信且未孚福將何所且祀有大  
小罰有重輕大則合寘於徒刑小則宜從於笞坐須明大  
小方辨重輕

同前

薛大球

祀以追孝祭以馭神厥儀孔昭執事有恪欲使粢盛豐備  
祖考歆黍稷禾之馨珪璧允植川嶽享沉浮之薦所司  
不供其職俾人用迷鍾鼓或闕於鏗鏘籩豆恒垂於薦楚  
法既將紊神其舍吐一作諸且無翼翼之容曷降穰穰之福  
自底不類噴有煩言固乃曠我之官告曰轉爾于悔斷從  
徒罪斯乃銳乎翻事言焉其何補也

大夫菜地祭判

得宗人掌三辰之法以猶鬼神祇之居辨其明物保章不  
供本職輒事左道人云菜地所祀

對

柳觀禮

天子建國法合掌於三辰諸侯立家禮許脩其五祀非直  
為之糾禁抑亦辨其名物各有職守無相奪倫至如日月  
運行陰陽消息乾坤測度之法山川沉埋之儀蓋存公道  
希憲於觀臺豈合私為輒陳於菜地宗人所祀正當左道  
之條保氏所陳深得禮刑之制

同前

王志悌

三代命祀闕有禮文六官陳殷匪無名秩田心不出職舉必

在公神人之官各恭爾位俎豆之事實有司存伊彼宗人  
祭于菜地苟不失禮夫何間言殊季孫之見嗤振疑作于  
岱嶽異晉侯之有疾不祀羽泉今茲掌彼三辰不脩其法  
紊我禋祀之道以猶鬼神之居祝詞爰論名物徒辨不以  
為禮神其享諸保章祠彼上玄昔疑作茲左道不恕其咎  
何所追逃

庶子牲祭失禮判

得庶子為大夫以上牲祭其家人告其失禮辭云宗子為  
士不可以貴就賤

對

王緯

霜露孝思朔月一作殷祭申其爵祿格以祖考苟或違經

是同匹嫡相彼庶子命為大夫體異承祧位踰齒族固令  
奉其常祀從以大宗獻上牲於歲時稱介子於工祝使僂  
然之歎不絕於聲如在之義復存於目乃黷於祀典越我  
巔毛恃肥膾之牲牲或將或肆繁豐盛之黍稷于豆于盞  
假一作祖禰之恩二重寔疑於夫子竊蒸嘗之薦三廟奚  
取於私家仍聞就賤之辭豈聽如流之責寔誣之祭人何  
以觀

士祭判

為士殺犬豕或入告君子遠庖厨凡有血氣之類不身踐  
訴云有故準禮不坐

對

陸泌

禮以制人命以防慾是彰品秩無取僭差苟豐約之不踰  
於德義而斯美乙周行已寘忝曰王臣班列尚微蓋為元  
士曾靖恭其位不虧莊敬之文當官而行既不越於時式  
執禮以動亦何恤於人言屬霜露既零春秋匪懈爰脩饗  
祀載展牲牲近彼庖厨雖則踐於血氣潔茲犬豕頗亦薦  
於夫疑膏既稱有故而殺難議不經之科或人詞游宜以  
麗法

同前

曹詵

禮探寧儉士有等威苟不體於牲軍則無儀於享祭惟乙  
命士克由舊章入戶僂然感四時而展敬祭神如在瞻一  
廟以式思告全將啓其血毛備物乃利疑作於犬豕脩戴

禮而不忒豈呂刑而可加或人何斯居然昧職好生軫憲  
徒有効於愛羊速訟不稽寧無慙於相鼠雖庖厨可遠身  
踐一作剪則誠爽至仁而蠲潔在躬親割乃允孚主敬稱以  
有故于何議刑

同前

崔署

孝子饗親祭神如在主人肅容式宴以衍邁豈有楚無償  
西隣之言餽罕不竭是陳東道之禮觀乙為士聞斯行諸  
日殺羔羊尚流詒訓歲脩犬豕何爽大經同燕人愛疑思  
雖踐血氣異楚氏之業終遠庖厨將食節而事時豈厚味  
而腊毒或人興訟捨禮何之有孚致辭勿問元吉

足士大牢祭判

足士大牢而祭

對

祀典所與人倫共仰遠越行禮事章程不容足士下流陋巷  
微物奇才有慙於梓漆利器無逮於干將事於鬼神陳於  
俎豆如在申敬惟馨展禮著於行潦無妨於預祀祠輒薦大  
牢載虧於非月既斯故犯宜寘于刑

士不合設壇判

一作大夫裕判

甲嘗有大事禘於王父及其魯高遂設壇為壇或曰僭而  
不經甲稱且有後命

對

祭盡於敬是敦孝享備其鼎俎潔爾牛羊克孚濟濟之容

實受穰穰之福眷言宗廟罔黷蒸嘗甲何人斯每事無間  
于彼裕典昧斯國經靡虔於寢之儀苟踰立廟之制有禱  
而祭實越等威我高我曾雖罄由衷之道為壇為墀且貽  
僭上之責前言匪習後命奚施待窮越禮之詞然正恤刑  
之典

同前

劉公輔

聖教因親人事有禮春秋祭祀以時思之眷言於甲愼終  
追遠裕父志高展於孝敬將序昭穆以列尊卑神明始交  
哀樂兼半祝史陳信曾無媿詞彼或何為忽乎與訟然則  
五廟諸侯大夫此之等差非無典誥儻貴通五爵甲猶固  
則有憑如位列萬人或告不宜無當請責名品方正刑書

同前

孝以思親祭之如在既申休惕武備蒸嘗惟甲承家方茲  
主鬯遵先王之法有事宗枋讀非月之書方申禘典既而  
享獻其繁壇墀克除在祀之敬不垂陳信之儀無闕有何  
所犯旋告不經請從後命之詞靡取無稽之訟

用牲于門判

洛水溢有司用牲于門或非之云苟濟於物祀之何爽

對

瞻彼洛矣其水泱泱雲澄綠潭樹夾清岸天作霖雨時維  
浸溢縱栢舟而難泛豈一葦之可航求惟主司能業爾職  
載懷黔首用祭玄冥巨浪無倪已不分於牛馬明德可恃



乃展敬於牲牲漢皇之歌彰夫舊史周官之禮著自前聞  
何彼人斯行所謂未蒿末學事則有據非將奚爲

歸胙判

甲監享以胙歸父餒而祭

對

康子元

無文成秩既重於肅雍有功則祭或防於跛倚甲以棘七  
方載式預監牲茅縮以陳遂聞歸胙餒食煙達應非尊者  
之餘胙致曰嚴自入先生之饌用此而祭頗乖經禮之儀  
未及於刑須黜乎典之議

同前

晁良貞

精意以享敬于展牲率禮莫違洽乎歸胙甲以膚敏典司  
蒸禴分以貴骨爰封介葛之犧奉乎高堂用入老菜之膳  
恩必逮下子道或霑其食餘祭示有先神理詎歆其餒末  
既比慶封之祀難許叔氏之禮

同前

毋嬰

宗廟崇儀禴嘗明祀先王有以尊祖考歷代所由追饗敬  
惟甲趨名莫奉蒸羞與於蜡賓非謂然之有歎侍於邦祭  
聞立者之無跛接神旌而下御來盡恭肅送靈驛而方行  
去昇微滅眇威儀之奕奕期降福之穰穰已而徃辟云除  
笙鏞則闕罷儀於國休事于家致胙以歸奉其親乎則可  
既餘爲餒因設祭而何垂求言禮經瞻所祠一作典匪伊  
天降寧惟地出有誤於事貽謗何定

同前

鄭齊望

三才既分六宗爰設或因地事地或因天事天明堂尊嚴配之儀清廟崇禘禘之典國之盛禮其何以先神之至誠罔不或降於是陳以簋簋薦之犧牲瑟奏空桑管吹孤竹甲言參大享監彼有司獻灌無虧福祐攸洽貴骨以頒於高品賤禮疑作體仍霑於庶寮他日鯉趨且聞歸胙今朝神惠更用祭先錫類之美則多黷禮之嫌宜避

同前

蕭述

郊廟蒸嘗春秋禴祀執膳成禮受胙為榮甲位列周行職惟神監舉信從政須慎威儀屬有事宗祊無虧肅敬鄒人問禮非惟黍稷之馨祝史正詞抑亦牲牲必備既而三牲徹俎肆夏戶還天子多歡始預受登之福先生有饌遂欣歸胙之榮初則視膳在堂終則降福于廟雖必嘗君賜頗取則於前規而不捨餼餘誠有違於昔典非復必齋之慎審乖如在之儀何慢神之致尤惟失禮而斯取

同前

袁暉

餼餘不祭昭彼前聞事且違經慙於達者甲忝居官序式陪精意悅分胙以言旋鄙過屠而自足瞻白華之養孝則盡誠昧非月之言理難逃責遠傳知禮雖惡於鄒人近取恤刑宜寬於漢典

同前

牛上士

祀祭以神官司執事昔者由也魯陪季氏之庭孰謂鄒人

文苑英華 卷一百一十九

文苑英華 卷一百一十九

余明

每入魯侯之廟甲既策名朝列監享嚴禋剛鬣柔毛不化  
庖人之饌白茅醴酒遽聞歸胙之榮食美思親無乖孝養  
餽餘有祭暫越禮經柴也之愚雖聞小過參也之魯何妨  
大倫以禮許人則吾豈敢棄瑕錄用將子有聞論情雖欲  
薄言與進未宜深責

同前

單有隣

甲幸彼曲成官同直指不彼被澤宮之誠與監清廟之一作

儀執燭薦腥禮循朝饋崇牙樹羽樂遽撤懸方致美於吉  
蠲即同班於福肉榮仍在已祿逮其親詠蘭陔之詩晨昏  
少力申綵服之養烏烏多歡用廣中厨因茲外胙爲中之  
道始則著於先嘗食父之餘終必歸於致祭且聖人之制

祭示有先夫婦各差父子異數盡於是矣何所疑焉

祭器判

少府監申稱太常寺牒稱須造罇壘彝器并舟光不許形  
狀制度請裁下

對

崔翹

先王制物禮器爲先商周虞夏容形各異象罇之儀爰刻  
象以成形玉竿之名遂以玉而爲飾壘雲采采如開五色  
之雲彝鳥軒軒似翥六時之鳥舟其足也夫復奚疑少府  
自有常儀太常非無舊準更請裁下未爽公方至於規模

一作並在於此如愚管見謂叶通途

祭器奢僭判

甲飾祭器以連行劾其奢僭訴禮也

對

殷之六瑚周之八簋始有列於雞象終見繫於猋豚陳其  
犧牲備以鼎俎用嚴莊敬則著品章是以有丹有壘資適  
用之恒理廢禁彬禁分貴賤之攸宜賻布之餘則以是具  
畫布之繫則見將施苟禮典而是違信奢僭而逾陷甲祧  
廟其主祭器爲先方用展於蒸嘗忽謬崇於樸斷博以庶  
物損其葆大考揮風之妙思得天巧之良工規制旋開鱗  
甲斯覩開絃疑作樂影宛似出於重泉擁劔潜形坐見儀  
於四豆雕其物象紊所欽崇一作况黍稷而非馨何刻畫  
而爲用且外骨內骨連行之行同於剖劓之力以儷陶匏

之器非取義於鄉士本嚴禮於邦家託以私門實忘公憲  
同管仲之饒簋昔所爲非擬季氏之舞庭孰不可忍此而  
捨罪予其何誅尚未覩於滅吞一作實有違於噬嗑

校四七十五字

八月抄汪姓記

文苑英華卷第五百十九

文苑英華卷第五百二十

判十八

喪禮門上二十七道

不供夷盤判四道

毀壞壓死判四道

木墜誤壓判一道

溺死判二道

復以冕服判一道

縣君死復判一道

哭子喪夫判一道

所知哭寢門判二道

李尹為主判二道

不供夷盤判

三品喪事夷盤不供司儀云時所不要

對

常无欲

喪也寧戚禮亦從宜思有厚於大臣義不遺於小歛今位

崇三品名謝百年國章自書其禮物有司豈怠於供擬若  
春羔已獻在寧室而須開夏蟲正疑闕夷盤而不可自當  
曠官之責何待司儀之按時則匪要法欲何加

同前

劉同昇

喪事攸列凶禮克明佐器者存乎有司致用者期於無悛  
綴几初設已陳含玉之儀夷盤不供何施造冰之禮且議  
事以制觀過知仁必若夏日斯炎鬼亡達於墻屋固當秋  
露結罪刑宜麗於簡書如或冬凄已冰寒氣方總則史魚  
之殯雖且在堂咎繇之譽終期緩獄理則可也彼其詰哉

同前

斐士淹

凌人掌冰以待邦事深山窮谷居仲冬而益堅獻羔祭韭  
事司寒而方出且云一日二日亦惟秋刷夏頒在用捨而  
有時於出納而惟允嗟此三品俄嬰六極金章罷去玉綬  
方開具疑作夷具厥衣於庭中設夷盤於牀下國之老疾猶或  
不遺朝之榮貴理宜從給徒以氣則分乎寒暑用則期乎  
折衷司儀所告省括之道雖勤主者定詞挈瓶之智斯得

同前

顧勝

生榮死哀士有恒禮弔喪歸賙國著成規三品云亡九泉  
方闕窀穸之事未展縣棺之儀哈祿所陳遂闕夷盤之典  
至若夏德方暑自可歸冰冬陰沍寒何煩設器徒窮獻羔  
之禮方議鷓鴣之訓

毀壞壓死判

乙有所毀壞而誤死人科其備慮不謹訴合所由爲罪

對

韓極

立物有恒堅樹在始繕而不固壞則難支既動作而必虞將紀律而斯約罰之惟五先明宥一作有過之文死則有三終傷不弔之旨若過誤而先定乃平刑而是察乙則何者率爾薄言已聞滅鼻止災胡乃反脣推過且守之必葺誠備慮而則安牆或不終將隙壞而誰咎罪有所在焉可逃夫

同前

崔殷

九州既滌是資築護庶役斯起于以僞工俾湍悍不生而安居作又彼已之乙謂爲何人率作而毀豈增修而藏事壞乃致害仍推過於所由言則飾文慮實無備然壓溺不弔酌戴禮而何傷而殺人者死在蕭章而難忘論以故傷闕則是減稱其誤殺科其不應爾徒有詞吾從丕弊

同前

田季羔

乙惟賤工執用爲是撤彼牆屋嘗聞作向之詩誤此殺人載犯暮虞之律雖因緣毀壞宜申重典而過失殺傷非無爨憲毀垣之下人盍違而去之壞宅之間乙恐非其罪也且凡所墮圯尤資審慎泉臺構落非梓匠之良規廣厦榱崩必鄭僑之見屨備慮欲繩其不謹懸危可恐乎無情既殊故犯之名請抵從輕之議許其收贖竊謂平反

同前

梁乘

幾有建立洎乎崩壞必慎傷人無致害物何哉主者曾不任能顧彼匠人豈因何巧既無備慮且乏周防遂昧立身果貽誤殺事殊隙壞物異棖崩將壓有契於國僑不弔遂符於戴禮况造作之與毀壞匠人之與主司並著臯繇之書合以所由為罪且人誰無死痛其不終宜用明刑以慰幽壤

木墜誤壓判

將作官修城木墜誤殺行者

對

五材並用關石是鈞百堵崇墉麗譙斯起頃以春風折棟秋雨摧梁雲構俄見於朝傾邊聲不聞於夜泣既而周官揆日斲之登登郢匠成風行者擾擾杠木之下危於坐堂改途而行何必由戶異文王之所避同子產之見壓孽由已作殃實人興取類憑河有均暴虎唐據法雖論誤殺在禮為之不弔

溺死判

甲與乙同舟既而甲懼水而投自因溺死其家訟乙故殺縣斷以疑

對

孫欽望

靈長演派資潤下以流謙習坎疏源含內虛而濟物故桂林望斷漢臣嗟其水源航葦無因衛女歎其河廣由是剡木為楫利涉存焉造舟為梁有自來矣惟甲與乙俱因行



邁駕言出遊大川爲阻家非漆蔕不可塞裳地若滄流爰  
憑鼓棹旣而甫辭岸浦喜二子之同舟方駕波心嗟一夫  
之墜魄尋漆園之奧旨未味藏舟考司寇之微言旋驚逝  
水至若沃焦不易呂梁難嗣一類士龍之笑幾慚漁父之  
勇家人告稱故殺縣司斷以疑條乙則有詞未云其伏向  
若平生宿憾殞命猶或推科如其邂逅相逢自死如何結  
罪誠可憫一作悍竿而求水府豈得陳牒而訟官曹不悟生  
也有涯將等死而無弔欲使長江岸上式旌孝女之碑塋  
篔曲中求作狂夫之曲竊稽狀迹不伏爲宜

同前

語稱有朋自遠易曰朋從爾思同氣相求同舟共濟呂安

之懷叔夜或泛黃河之水王子之尋戴逵亦冒山陰之雪

何以仰止欽賢是慕想彼甲乙道契筌蹄汎漲海之雲若

見一作星蓬萊之樹棹倚砂之日方追河洛之仙旣而智乏

謀身情乖拯物覆舟之慎想伯夷而載虧驚濤之遊歎伯

昏而遂遠三命有極百齡俄謝禍兮難倚寧收轉壑之魂

比之匪人忽覩盈庭之訟尋端指狀於甲誠亦可矜據理

詳刑在乙寧宜寘罪何者禮稱不弔溺者已絕律通人情

乙惟一作爲無咎庶從平典用叶大倫

同前

鴻爐賦象人壽幾何生榮死哀物類同致晝夜不捨宣尼  
興其歎息吉凶共同賈誼發其詞賦眷言甲乙俱涉大川

懸流波而得朋理征棹而云邁乙則同舟而濟宛若神仙  
甲乃懼死而投遽嗟沉溺波心乍沒還疑觀影之人泉路  
不歸便似懷沙之客然則渡河奏曲曾不爾思逝水沉冤  
而招其咎家人有訟虛陳故殺之端乙既無讐難寘惟輕  
之典薄訴不伏理合哀矜懸斷以疑殊乖部一作察以愚  
管見釋放爲宜

復以冕服判

甲復以冕服御史糾其違失

對

裴子建

喪等孔昭復禮攸設公侯以下非無降殺用明沿襲且辨  
等威求彼平生振衣裳而有處號之某甫冀冤鬼而知歸

至如衮冕是陳爵弁斯列用捨之際抑亦有殊甲實伊何  
昧我常度未明死者之貴賤罕識凶儀之重輕自可憲章  
宣尼每事有問何乃祖述季路率爾而行法則無稽難爲  
叔氏之許舉而不物豈免先王之誅白簡彈違固其宜也

同前

常建

喪定等列在乎中制爵爲公侯招以上服禮則有數甲其  
謂何必若錫重五侯寵加八命寢于中霤固當復彼東榮  
適在他邦是何升其左轂冕服則順鐵冠奚爲如或有愆  
于儀不象厥德憊而有作同彼季孫孝則莫彰異夫曾子  
所謂殺禮宜其聚慝徵大夫之轍理既有違論司敗之刑  
法將何追

同前

祖詠

吉凶殊流冕服異數苟將失制敢用此規而泉壤幽深生  
涯盍盡綴足歛手初聞於長遊折設階乘屋遽見於三號甲  
也用心審于盡愛尤差司服還惜禮經招平生之衣不有  
魯子之問加冕弁之服更異邾婁之言相彼豸冠素爲人  
望今將一紉實謂正途

同前

薛彥國

服以命賢喪則觀禮用存升降不易紀律故朝會之序必  
布常於典命死喪之儀亦辨等於司服指彼甲也復冕其  
誰必也德亞元良位光袞職隨會有級見受命叔孫以車服  
表庸自可飭虞人以設階命元士而即次取茲驚袞載展  
升降之禮登彼毳弁或同秦佚之號道則庶乎禮無違者  
如或秩殊稍食家匪伐冰以陪臺之隸人遂滅裂於喪紀  
寘之於理誰謂不然憲司所劾既不書於祿位宗伯之義  
亦孰知其用捨且曰獻狀必也正名

同前

郭廷誨

生也有涯死而必復苟或不率克有常憲故國備典訓禮  
陳等威疑作藏虞人以具一作設階崇壯一作秋疑作秋士以  
奉職若禱其五祀則事始東榮或問以三號而復行左轂  
自適變通之要夫何過差之有惟甲向者以冕而復同鄒  
人之失德刺起素冠齊魯倍之虧喪僭彰玄毳既非五等  
之列湏異九儀之品何乃不類祗自塵兮非大猷是經而

峻簡斯糾違失之禮其難拾諸

同前

梁乘

祿秩之序貴有常尊凶喪之儀禮無越等已矣逝者魂兮  
不來死實生哀歿西山於九夜招之望反將北面而三號  
既而骨肉復歸精魄無象宛其死矣則無不至且祭神不  
能如在神猶未饗復竟不似其服魂將奚依至若在館在  
家匪無名數公侯卿士實有彝倫小者則榆狄素紵諸侯  
乃衮衣冕服未詳甲也其位若何儻有土之公卿御史斯  
為折角若食菜之卿士甲也宜從噬膚

同前

薛大球

儉德之恭侈惡之大書分品命禮著等威苟違嚴律曾

抵禁稽諸甲也彼何人斯天不憖遺逆嬰六極服以昭  
見詔九章至如受服統戎建節將命或聞以矢亦日以綏  
固傷逝者之魂或載先王之典且甲兮云歿亦孔之哀莫  
知王爵之班胡僭弁師之冕必若位應受則邑錫建侯功  
有良夫之崇德叅士會之賜亦奚妨升轂合禮一作發榮  
倘或生罔嘉聞死微可作湏湯大夫之簣豈復諸侯之冕  
嗟夫鐵冠所糾請審毳衣是用

縣君死復判

縣君死於路所由不以綏復於右不給役車遽還

對

眷彼縣君征途有疾庚子戒曰止鵬生憂辰已臨年巢鷺

起歎東流逝矣北首長辭遽委魄於松門奄歸魂於蒿里  
不祿公館須申臯某之儀屬續私家即罷求幽之義禮有  
明說焉可轍違準例合得遞車所司如何不給但比壁疑  
壁用刑須窮兩造鈞金察獄必聽五司疑公私之節未明左  
右如何定罪請更詳委方可要終

哭子哭夫判

哭子哭夫事

對

喪子之親哀情已極喪夫之婦為死難勝非無寡鶴之悲  
豈息驚猿之痛然喪夫喪子悽感雖同而哭子哭夫禮儀  
須別穆相之卒已有前規敬姜告言一何無識縣承行罰

之日於禮已違娶婦指貽之憊在律難恕顧茲刑憲並合  
推科

哭子哭夫判

季氏夫子喪哭不捨晝夜鄉人告違禮

對

季氏令質幽閑秀容綺艷事夫有道金釵見美於梁鴻訓  
子多方布被推賢於孟母為善必應天乎不仁三從靡依  
兩喪相次歌枕之淚空灑倚廬之望莫依不捨晨昏深符

禮制一作則

所知哭寢門判

太史令緒所知亡哭於寢門之外告違禮

對

諸葛若驚

歲月驚過人生若浮棲露不居空嗟盡死截颺易往共盡  
何言令緒歎交臂之無依恨同心而遽失瞻九原而長想  
白日何年撫三益而傷窺青松上几雖墳未宿草而室無  
其人同宿畢恐用檀弓伯高事蓋荀子驛之奄終類一哀  
而出涕寢門興慟未見其容外野申悲嘗聞斯旨致哭雖  
稱失位寧戚亦著前聞禮貴因情夫何推究

所知哭寢門判

甲哭友人於寢門之外友弟將為踈闊輒毆之

對

趙自勵

太虛運化勞息有期聖人制禮哀樂殊節甲以詩稱伐木

義切斷金追管鮑之平生欣然相得鄙張陳之棄置疑

莞爾無耻一作臨川興歎逝者如斯怨天地之不仁撫琴

書之空在昔之莫逆把黃菊而思來今也則亡乘素車而  
慟哭哭於門外禮亦宜之責以相輕誰執其咎且孔丘將  
聖昭著格言有弟何知胡然昧議龍頭不見已喪朋從鳳  
字未題遽招伊戚非理輒毆宜啓刑書請驗所傷用申明  
罰

里尹為主判

乙妹無子寡而死請里尹為主決曹椽科其違禮訴云其  
夫無族

對

景少遊

乙妹三從靡依一志空潔榮落朝薨寃棲夜臺生則事兄  
義或遵夫歸妹死而誰主禮用行乎寡妻夫無執紼之姻  
里有主喪之尹雖親不可間義並連枝而事寧敢逾禮從  
異教決曹謬舉職我之由訴者有詞今汝則盡尚恐邑多  
匍匐之子家有不相之隣未詳其宜莫適問罪

同前

閻渙

死生有命男女大綱于其不天可以往唁惟乙之妹孀而  
無實始窈窕以適人挑天斯美俄憚獨以處室荼毒何深  
生無託於偕老死奄赴於同穴言念夫族曾何子遺嗟今  
隣人復已湮滅乙以骨肉之戚匍匐而來據親則可奔喪  
義不合襄事况臨窆窆復引銘旌諒天窮之人請里尹  
爲主決曹雖詰於禮無違

同前

喪則有等自辨於重輕禮之所行亦崇於節制乙以天乎  
降戾斯殞其夫則穆伯早亡鄧侯無嗣啜其淚矣何痛如  
之求懷夫黨無親因求里尹爲主禮則然矣人何非哉且  
決曹所稱亦何加止嘉蓋以喪也寧戚禮則因情姊愛去官  
見稱於陳重弟服去職著美於譙玄斯則事之有由一作  
言也何爽得失相半斯之謂歟

文苑英華 卷一百一十五

文苑英華卷一百一十五

校定九十字今日得完三卷兼旬未有也八月廿九日記

